



UPA 2015/120-121-122

Randi Vestergaard Evaldsen

14. april 2015

**Aningaasaateqarfimmi aningaasat katersat ileqqaakkallu erniaat taamaallaat atornerqarsinnaaneri siunertaralugu Aatsitassarsiornermi Aningaasaateqarfik pillugu Inatsisartut inatsisaannut nr. 6, 5. december 2008-meersumut allannguutissamik saqqummiussinissaannik Naalakkersuisut peqquneqarnissaannut Inatsisartut aalajangiiffigisassaattut siunnersuut.**

**Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allangortinneqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut, imaalillugu Inatsisartut ukiut tulleriissut aappassaanni nunatta karsiata naatsorsuutaanik aatsaat akuersereeraangata aningaasaateqarfik aallartinneqartassasoq, aatsaallu ukiumi naatsorsuiffiusumi aatsitassanit isertitat 10 millioner kroninit annertunerusimappata. Inatsisartut inatsisaat ukiup tullissaani 1. januarimi atuutilissaaq imaluunniit Naalakkersuisut aalajangiippata siusinnerusukkut. 10 millioner kronit taaneqartut Inatsisartut ukiumi pineqartumi Aningaasaqarnermut inatsisaat naapertorlugu ataatsimut isigalugu akit akissarsiallu nalingannut naleqqussarneqartassapput.**

**Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allangortinneqarnissaanut kingusinnerpaamik UPA2016-imi Naalakkersuisut peqquneqarnissaannut Inatsisartut aalajangiiffigisassaattut siunnersuut, imaalillugu Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni aatsitassarsiornermit isertitanut paasinninnera Namminersorneq pillugu inatsimmi aatsitassarsiornermit isertitanut paasinninnermit immikkoortinneqassasoq. Allanguinermi tigussaasumik atortut, soorlu oliamik maqisuunnginnissamut atortut, illuutit sanaartukkalluunniit allat atortullu Kalaallit Nunaata Aatsitassarsiornermi Aningaasaateqarfiani aatsitassarsiornermit isertitatut naatsorsuutigineqannginnissaat allanneqartariaqarpoq.**

(Inatsisartunut ilaasortaq Naaja Nathanielsen, Inuit Ataqatigiit)

Kalaallit Nunaanni Aatsitassanut Aningaasaateqarfiup siunertaasa pingaarnerit ilagaat inuiaqatigiinni tungiuinerup siunissami qularnaarnissaa. Aatsitassat ataavartuunngitsumik isertitsissutaasarput, aatsitassarsiornermiillu isertitat aningaasaateqarfimmut inissinnerisigut



qularnaassavarput nunatsinni aatsitassarsiornerup aamma kinguaariinnut takkuttussanut iluaqusiinissaat. Tamanna taaneqarsinnaavoq kinguaariinnik takkuttussanut ersoqateqarnertut.

Aatsitassanut aningaasaateqarfiup isumagaa - aatsitassarsiornermi isertitanik aningaasaateqarfimmut inaaliisarnikkut - pisortat aqunneqanngitsumik atuijululersinnaanerannik aqutsinissaq, atuijulunnerup kingunerisinnaammagu aningaasat nalikilliaratornerat unammilleqatigiinnerullu ajorseriarnera. Tamatuma saniatigut eqqarsaataavoq, Aatsitassanut aningaasaateqarfiup Namminersorlutik Oqartussanut tunniussaqaqtarnissaa, Danmarkimiit bloktilskudit ikiliartuaartinneqalerpata. Tamanna ersarissumik takuneqarsinnaavoq Kalaallit Nunaanni Aatsitassanut aningaasaateqarfik pillugu inatsisip § 7-ata imm. 2-ani.

Demokraatini isumaqarpugut pitsaasuusooq Kalaallit Nunaata Aatsitassarsiornermi Aningaasaateqarfiata iluanaarutai kisimik ulluinnarni inuiaqatigiinni tungiuinermut atorqeartassasut, Demokraatini siunnersuut tamanna taperserparput.

Demokraatini aamma ilalerparput siunnersuutigineqarmat, Inatsisartut ukiut tulleriissut aappasaanni nunatta karsiata naatsorsuutaanik aatsaat akuersereeraangata aningaasaateqarfik aallartinneqartassasooq. Tassaniippoq ukiumi naatsorsuiffiusumi aatsitassanit isertitat 10 millioner kroninit aatsaat annertunerusimappata. Taamaasiornikkut qularnaarneqassaaq, aatsitassarsiornermut aningaasaateqarfiup piviusunngortinneqartannginnissaat ukiumi ataasiinnarmi imaluunniit ataasiarluni annertuumik isertitaqarnikkut.

Demokraatini aamma isumaqatigaarput, atortuutit soorlu uuliarluarnermut akiuiniutit, illuutit imaluunniit sanaartukkat atortullu allat Kalaallit Nunaata Aatsitassarsiornermi Aningaasaateqarfiani aatsitassarsiornermi isertitatut taallugu isertitaatut nalunaarsorneqartassanngitsut.

Demokraatini siunnersuutit pingasut tamaasa Inuussutissarsiornermut Ataatsimiititaliamut innersuuppagut.